

復得返自然 / 胡延

綠水青山，固造物主之無盡藏；魚蝦草木，無非順四時而化生。何妨放下窮通得失，寵辱榮枯，共賞湖山之趣，田園之樂？

歸田

臥擁琴書賦酒詩 昨非今是復奚疑
不貪富貴功名日 只羨桑麻守拙時
嫩柳栽成彭澤樹 夭桃攀折武陵枝
盈虛有數安天命 草木無心是我師

觀魚

錦鱗翔泳樂深池 向晚徘徊惹舊思
夢醒繁華嗟日暮 情虛澹泊任星移
龍門未托不言悔 涸轍猶懼莫笑痴
物我皆忘隨一念 水中濠上兩相知

閒居

淼漫平湖淡掃顏 瑤池仙景在人間
雲煙縷縷藏幽谷 樹影疏疏點遠山
石上釣臺堪抱膝 水邊蘆渚好憑欄
松根一枕東方白 世外逍遙自得閒